

## **Batu Sapi: Siapa tanggung risiko terbesar?**

**Malaysiakini.com**

**October 26, 2010**

ANALISIS BERITA Pertaruhananya jelas amat besar bagi ketiga-tiga calon yang bertanding dalam pilihan raya kecil parlimen Batu Sapi pada 4 November ini.

Ianya menjadi menarik kerana pilihan raya kecil ini dilihat sebagai pertembungan sebenar pertama antara BN, parti pembangkang tempatan, Parti Maju Sabah (SAPP) dan Pakatan rakyat.

Tetapi yang lebih penting ialah impak keputusannya nanti - bukan sahaja terhadap kecenderungan pengundian di Sabah yang digelar Perdana Menteri, Datuk Seri Najib Tun Razak sebagai "deposit tetap" BN, tetapi juga bakal menentukan masa depan calon-calon yang bertanding.

Mungkin risiko terbesar diambil oleh presiden SAPP, Datuk Yong Teck Lee yang mengambil keputusan bertanding dalam pilihan raya kecil parlimen Batu Sapi.

Ini adalah pertama kali pihaknya bertanding menentang BN, sejak ia meninggalkan gabungan itu pada 2008 kerana tidak yakin dengan kepimpinan perdana menteri ketika itu, Tun Abdullah Ahmad Badawi.

Sejak itu, Yong dan SAPP melonjakkan diri mereka sebagai pilihan terbaik untuk masa depan Sabah, serta menghidupkan kempen 'Sabah untuk penduduk Sabah' dan kempen 'Borneonisation' dalam usaha untuk meyakinkan pengundi menyokong parti mengambil alih pentadbiran negeri itu.

Namun keputusan Yong untuk bertanding di kerusi tersebut mungkin akhirnya menjadi pedang dua mata yang boleh melonjak atau menghancurkan masa depan politik bekas ketua menteri Sabah itu.

Sebagai presiden parti, beliau ada kelebihan dari segi kedudukannya sebagai calon, serta ditambah pula dengan pengalaman luasnya sebagai pemimpin akar umbi.

Jika beliau menang, ia boleh dilihat sebagai tanda sokongan rakyat kepada partinya untuk merampas Sabah daripada BN datang pilihan raya umum akan datang.

Jika kalah, ia mungkin menandakan berakhirnya impian SAPP untuk menguasai Sabah.

Copyright © 1999-2007 Mkini Dotcom Sdn. Bhd.

Source : <http://www.malaysiakini.com/news/146423>